ley abgötterey. Daruber wissen sie lauter nichts vom Sohn Gottes noch von der gnadenvorheissung, so im euangelio ist offenbaret. Aber die kirche Gottes allein behelt beydes, die lehre des gesetzes vnd euangelij gantz vnd vnuorfelscht, erkennet den Sohn Gottes, vnsern herrn Jesum Christum, der fur vns gecreutziget vnd widerumb vom tod auferwecket ist, weiß auch allein die vrsach, woher sünde vnd todt kommen, vnd hat warhafften bestendigen trost in allen nöten. Zum vierten haben sie das auch fur ein groß zeugnis gehalten vnd angezogen, das die, so der christlichen religion mit hertzen zugethan sindt, in irem gewissen befinden trost des heiligen Geistes, erhörung des gebetes vnd viel vndt mancherley zeugnis der gegenwart Gottes bey ihnen. Dieses zeugnis, so ein jeder christ bey sich selbst in geistlicher erfarung [280v:] fület, ist gewislich eines von den furnemsten anzeigungen, das Gottes wort warhafftig sey. Zum fünften haben sie auch den grossen muth vnd bestendigkeit der merterer billich hoch geruhmet. Denn weil dieselben vor-15 nunftige leut gewesen sind vnd doch allerley merter vnd den todt selbst von wegen der christlichen religion haben außgestanden, muss es ie nicht fabelwergk sein, darumb sie leib, leben, gut vnd blut so getrost vnd freüdig haben zugesetzt. Zum sechsten ist auch als ein großes zeugnis von inen angezogen, das die christliche kirche zu allen zeiten geblieben vnd derselben lehr ie mehr vnd mehr fortgepflanzet, auch fur vnd fur lehrer erwecket sindt, die solcher lehr haben zeugnis geben vnd treülichen andere dauon vnterrichtet. Zum siebenden bestetiget die christliche religion auch dieses, das die feinde der kirchen Gottes, ketzer vnd tyrannen, zu allen zeiten so greülich gestraft vnd schrecklich zu boden gangen sindt, das man hat müssen bekennen, das 25 es Gottes straffen sindt.

Diese zeugnis ist sehr nütz, das sie allen menschen vnd sonderlich der jugendt bekandt sein, damit jedermenniglich³⁴⁹ fur gewiß halten möge, das dieses allein die rechte vnd warhaffte lehr von Gott sey, welche vorfasset ist in den schrifften der propheten vnd apostel. Wir bitten aber den ewigen Sohn Gottes, das er solche lehr bey vns vnd vnseren nachkommen erhalten vndt vnsere hertzen dardurch zu seiner warhafften erkendtnis vnd anruffung erwecken wolle vmb seines nhamens ehre willen vnd zu vieler menschen trost vnd seligkeit. Amen.

³⁴⁹ jedermann. Vgl. Art. Jedermänniglich, in: DWb 10, 2292.